

დანართი

არასამეწარმეო (არაკომერციული) იურიდიული პირის
„ახალციხის სერვის ჯგუფი“

წ ე ს დ ე ბ ა

მუხლი 1. ზოდადი დებულებანი

1. არასამეწარმეო (არაკომერციული) იურიდიული პირი - „ახალციხის სერვის ჯგუფი“ (შემდგომში - იურიდიული პირი) არის კერძო სამართლის არასამეწარმეო (არაკომერციული) იურიდიული პირი, რომელიც შექმნილია საქართველოს ორგანული კანონის „ადგილობრივი თვითმმართველობის კოდექსი“-ს საფუძველზე, საქართველოში მოქმედი კანონმდებლობათა დაცვით.
2. იურიდიული პირის სახელწოდება: „ახალციხის სერვის ჯგუფი“.
4. სამართლებრივი ფორმა: არასამეწარმეო (არაკომერციული) იურიდიული პირი.
5. იურიდიული მისამართი: საქართველო, ქ. ახალციხე, მ. კოსტავას ქ. N18
6. იურიდიული პირს აქვს დამოუკიდებელი ბალანსი, საანგარიშსწორებო და სხვა ანგარიშები საბანკო დაწესებულებებში, არაკომერციული იურიდიული პირის სხვა რეკვიზიტები.
7. ორგანიზაცია საკუთარი სახელით ახორციელებს თავის უფლებებსა და მოვალეობებს, როგორც საქართველოს, ისე უცხოქვეყნის ფიზიკურ და იურიდიულ პირებთან, დებს გარიგებებს, შეთანხმებებს, საკუთარი სახელით შეუძლია გამოვიდეს მოსარჩელედ და მოპასუხედ სასამართლოში.

მუხლი 2. იურიდიული პირის დამფუძნებელი

1. იურიდიული პირის დამფუძნებელია ახალციხის მუნიციპალიტეტი. მისამართი: ქ. ახალციხე, მერაბ კოსტავას ქ. №18, საიდენტიფიკაციო ს/კ 224101317.
2. დამფუძნებელი განსაზღვრავს იურიდიული პირის წესდებას, მიზნებსა და ამოცანებს.
3. იურიდიული პირის დამფუძნებლის სახელით მოქმედებს ახალციხის მუნიციპალიტეტის მერი.

მუხლი 3. იურიდიული პირის მიზნები და ამოცანები

- ა) ახალციხის მუნიციპალიტეტის ადმინისტრაციულ საზღვრებში მდებარე ქუჩების, მოედნების, ბაღების, სკვერების, საერთო სარგებლობის თავშეყრის ადგილების დაგვა/დასუფთავება, მოვლა/პატრონობა, ნარჩენების შეგროვება/გატანა, კეთილმოწყობა;
- ბ) მუნიციპალიტეტის ტერიტორიაზე არსებული გარე განათების სისტემის მოვლა/პატრონობა, აღდგენა/რეაბილიტაცია;
- გ) საყოფაცხოვრებო და მყარი ნარჩენების შეგროვება, განთავსების ადგილზე ტრანსპორტირება;
- დ) სანაგვე ბუნკერების შეკეთება /აღდგენა;
- ე) სანიაღვრე ქსელების სრულფასოვანი ფუნქციონირების უზრუნველყოფისათვის ხელშეწყობა;
- ვ) მუნიციპალიტეტის სამოქმედო ტერიტორიაზე არსებული ნარგავებისა და ხე-მცენარეების მოვლა-პატრონობა;
- ზ) საზოგადოებრივი სარგებლობისა და თავშეყრის ობიექტების, სანაგვე ბუნკერების, დერატიზაცია, დეზინფექცია, დეზინსექცია;
- თ) ახალციხის მუნიციპალიტეტის ტერიტორიაზე არსებული გზების, ხიდების, საფეხმავლო ბილიკებისა და სხვა საგზაო ნაგებობების, სხვადასხვა საგზაო ნიშნების მოვლა/პატრონობა, აღდგენა/რეაბილიტაცია;
- ი) ახალციხის მუნიციპალიტეტის ტერიტორიაზე არსებული ბავშვთა გასართობი ატრაქციონების, გარე გამოყენების სპორტული მოწყობილობების მოვლა-პატრონობა, აღდგენა/რეაბილიტაცია;

- კ) საერთო სარგებლობის სველი წერტილების მოვლა/პატრონობა, აღდგენა/რეაბილიტაცია;
- ლ) მუნიციპალიტეტის ტერიტორიაზე მოხეტიალე, უპატრონო და მიკედლებული ცხოველების იმუნიზაცია, კასტრაცია, სტერილიზაცია.
- მ) მუნიციპალიტეტის მიერ დაგეგმილი კულტურული და სპორტული ღონისძიებების ორგანიზებაში ხელშეწყობა;
- ნ) ახალციხის მუნიციპალიტეტის ადმინისტრაციული შენობების დასუფთავება;
- ო) ნებისმიერი სხვა საქმიანობა რომელიც გამომდინარეობს წინამდებარეც წესდების მიზნებიდან და ფუნქციებიდან და არ ეწინააღმდეგება კანონით გათვალისწინებულ მოთხოვნებს;

მუხლი 4. იურიდიული პირის მართვა

1. იურიდიული პირის ხელმძღვანელობა და წარმომადგენლობა ენიჭება დირექტორს, რომელსაც ნიშნავს და ანთავისუფლებს ახალციხის მუნიციპალიტეტის მერი.
2. დირექტორი ანგარიშვალდებულია ახალციხის მუნიციპალიტეტის მერის წინაშე და პერიოდულად (მოთხოვნისთანავე) წარუდგენს მას ანგარიშს, იურიდიული პირის საქმიანობის შესახებ.
3. დირექტორი:
 - ა) წარმოადგენს იურიდიულ პირს მესამე პირებთან ურთიერთობაში. ორგანიზაციებსა და ყველა ინსტანციის სასამართლოში,
 - ბ) ადგენს საშტატო ნუსხას, სტრუქტურას, სახელფასო ფონდს და შესათანხმებლად წარუდგენს ახალციხის მუნიციპალიტეტის მერს.
 - გ) თანამდებობაზე ნიშნავს და ათავისუფლებს იურიდიული პირის თანამშრომლებს, იღებს გადაწყვეტილებას მათი წახალისებისა და დისციპლინარული პასუხისმგებლობის დაკისრების შესახებ.
 - დ) საკუთარი კომპეტენციის ფარგლებში, გამოსცემს ინდივიდუალურ-სამართლებრივ აქტს;
 - ე) ორგანიზაციის სახელით, ახორციელებს საბანკო ურთიერთობებს, ხელს აწერს საფინანსო დოკუმენტებს და სხვა სახის სამართლებრივ აქტებს;
 - ვ) წარმართავს და ორგანიზებას უწევს დაწესებულების საერთო საქმიანობას, პასუხისმგებელია ამ საქმიანობის კანონიერებასა და ეფექტურობაზე;
 - ზ) დამფუძნებელთან შეთანხმებით, კანონით დადგენილი წესითა და კომპეტენციის ფარგლებში, განახორციელებს შესყიდვას, გეგმის საფუძველზე.
 - თ) მოვალეობის შეუსრულებლობის ან არაკეთილსინდისიერად შესრულების შემთხვევაში, არასამეწარმეო (არაკომერციული) იურიდიული პირისა და დამფუძნებლის წინაშე პასუხისმგებელია წარმოშობილი ზიანისათვის;
 - ი) წესდებით განსაზღვრული მიზნებისა და ამოცანების მისაღწევად უფლებამოსილია განახორციელოს კანონით გათვალისწინებული სხვა მოქმედებები.
4. ახალციხის მუნიციპალიტეტის მერი, დირექტორის არყოფნის შემთხვევაში, დირექტორის მოვალეობას აკისრებს იურიდიული პირის თანამშრომელს.

მუხლი 5. დაფინანსება

1. იურიდიული პირის დაფინანსების წყარო შეიძლება იყოს:
 - ა) ადგილობრივი ბიუჯეტი;
 - ბ) ა(ა)იპ-ის მიერ გაწეული მომსახურებიდან მიღებული შემოსავალი;
 - გ) გრანტები;

- დ) შემოწირულობები ფიზიკური და იურიდიული პირებისგან;
 - ე) საქართველოს კანონმდებლობით ნებადართული სხვა შემოსავლები.
2. ამ მუხლით განსაზღვრული სახსრები, კანონმდებლობის შესაბამისად, შესაძლებელია გამოყენებულ იქნას მხოლოდ იურიდიული პირის მიზნებსა და ამოცანების განხორციელებას.

მუხლი 6. იურიდიული პირის საკუთრება და ქონება

1. არასამეწარმეო (არაკომერციული) იურიდიული პირის ქონებას შეადგენს წესდებით გათვალისწინებული მიზნებისა და ამოცანების განსახორციელებლად საჭირო ფულადი სახსრები და მატერიალური რესურსები.
2. არასამეწარმეო (არაკომერციული) იურიდიული პირის სარგებლობაში არსებული უძრავ-მომრავი ქონება და მასთან დაკავშირებული საკითხები რეგულირდება საქართველოს კანონმდებლობით დადგენილი წესის შესაბამისად.

მუხლი 7. საქმიანობა, რომელიც საჭიროებს თანხმობას

1. იურიდიულ პირს შეუძლია მხოლოდ დამფუძნებლის თანხმობით განხორციელების შემდეგი ქმედებები:
 - ა) უძრავი ქონების შეძენა, გასხვისება და დატვირთვა;
 - ბ) სესხის აღება;
 - გ) თავდებობა;
 - დ) სხვა გადაწყვეტილებები, რომელიც სცილდება არასამეწარმეო (არაკომერციული) იურიდიული პირის საქმიანობის ფარგლებს.

მუხლი 8. კონტროლი

1. იურიდიული პირის საფინანსო-ეკონომიკურ საქმიანობას აკონტროლებს არასამეწარმეო (არაკომერციული) იურიდიული პირის დამფუძნებელი მისდამი დაქვემდებარებული სამსახურის მეშვეობით.
2. დამფუძნებელს უფლება აქვს მოითხოვოს კონტროლის განსახორციელებლად საჭირო მასალები და ინფორმაციის წარდგენა, მასვე შეუძლია შეაჩეროს ან გააუქმოს იურიდიული პირის არამართლზომიერი გადაწყვეტილება.

მუხლი 9. წესდებაში ცვლილებებისა და დამატებების შეტანის წესი

წესდებაში ცვლილებებისა და დამატებების შეტანა ხორციელდება საქართველოს კანონმდებლობით დადგენილი წესით.

მუხლი 10. ლიკვიდაცია და რეორგანიზაცია

1. არასამეწარმეო (არაკომერციული) იურიდიული პირის რეორგანიზაცია ხორციელდება საქართველოს კანონმდებლობით დადგენილი წესით, დამფუძნებლის გადაწყვეტილებით .
2. არასამეწარმეო (არაკომერციული) იურიდიული პირის ლიკვიდაცია ხორციელდება მიზნის მიღწევის შედეგად, სისხლის სამართლის საქმეზე კანონიერ ძალაში შესული სასამართლოს გამამტყუნებელი განაჩენის საფუძველზე, გაკოტრებისას ან საქართველოს სამოქალაქო კოდექსის 38-ე მუხლის შესაბამისად.
3. ლიკვიდაციის დროს უნდა დასრულდეს მიმდინარე საქმეები, დადგინდეს მოთხოვნები, დარჩენილი ქონება გამოიხატოს ფულად ერთეულში, დაკმაყოფილდნენ კრედიტორები და დარჩენილი ქონება გაუნაწილდეს უფლებამოსილ პირებს.

4. დამფუძნებლის გადაწყვეტილება საზოგადოების ლიკვიდაციის პროცესის დაწყების შესახებ უნდა დარეგისტრირდეს მეწარმეთა და არასამეწარმეო (არაკომერციული) იურიდიული პირების რეესტრში. ლიკვიდაციის პროცესი დაწყებულად ითვლება მისი რეგისტრაციის მომენტიდან.

5. ლიკვიდაციის შედეგად დარჩენილი ქონების მიღებაზე უფლებამოსილ პირებს განსაზღვრვს არასამეწარმეო (არაკომერციული) იურიდიული პირის დამფუძნებელი. არასამეწარმეო

(არაკომერციული) იურიდიული პირის ლიკვიდაციისას ქონების გასხვისება შესაძლებელია, თუ:

ა) გასხვისება ხელს უწყობს მის მიერ დასახული მიზნების განხორციელებას;

ბ) ემსახურება საქველმოქმედო მიზნებს;

გ) ქონება გადაეცემა სხვა არასამეწარმეო (არაკომერციულ) იურიდიულ პირს.

6. აკრძალულია ლიკვიდაციის შედეგად დარჩენილი ქონების განაწილება არასამეწარმეო (არაკომერციული) იურიდიული პირის დამფუძნებლებს, წევრებს, ხელმძღვანელობისა და წარმომადგენლობითი უფლებამოსილების მქონე პირებს შორის. დარჩენილი ქონების განაწილება მოხდება კანონით დადგენილი წესით.

7. ლიკვიდაციას ახორციელებს ხელმძღვანელობის უფლებამოსილების მქონე პირი (პირები) ან კანონით დადგენილი წესით დანიშნული ლიკვიდატორი. ლიკვიდატორი პასუხს აგებს, როგორც ხელმძღვანელობისა და წარმომადგენლობითი უფლებამოსილების მქონე პირი.

მუხლი 11. დასკვნითი დებულებები

1. წესდების რომელიმე დებულების ბათილად ცნობა, გავლენას არ მოახდენს წესდების სხვა დებულებების ნამდვილობაზე.

2. წესდებებსა და საქართველოს მოქმედ კანონმდებლობას შორის არსებული შეუსაბამობის შემთხვევაში მოქმედებს კანონი.